

# La Biblioteca Laax ei zun activa

■ (ad) Ella Biblioteca Laax anfl'ins buca mo cudischs ch'ins ha daditg encuret, ch'ins havess gia daditg giu queidas da leger ni ch'ins duvrass per in referat. Il team dalla Biblioteca organischa era differentas occurrenzas en sias localitads ella Casa De Mont el vitg sut a Laax. Gievgia vargada ei ina emperneivla gruppetta da persunas interessadas alla litteratura s'entupada alla «Stiva litterara». Igl ei gia la quarta gada che la biblioteca organischa ina sera da discussiun davart ina autura ni autur e sia ovra. Quella gada ei stada dedicada al roman da *Peter Hoeg* cul tetel: «Fräulein Smillas Gespür für Schnee». Tras la sera ha scolast secundar *Albert Düggelein* accumpignau las participontas ed ils participonts. Sias explicaziuns arisguard litteratura ein adina fetg instructivas.

## Proxima «Stiva litterara»

Per la proxima «Stiva litterara» che ha liug il schaner 1999 ha il team dalla Biblioteca Laax concludiu, suenter haver tractau treis romans, da sefatschentar d'in cudisch cun historias da *Peter Bichsel*. «Die Schulmeistereien», in cudisch buca mo per magisters. Forsa astgan las organisaturas beneventar aunc novas persunas che han interess d'entrar in tec

pli intensivamein ella lectura da cudischs e da separticipar al rudi. Mo curascha.

## Jolanda Cadalbert prelegia

Mesjamna, ils 7 d'october, allas 20.00, prelegia *Jolanda Cadalbert Schmid*, oriunda da Rueun e sesenta a Basilea, da siu niev cudisch: «Aber Papi hat's erlaubt». Gia 1992 era la Sursilvana vegnida enconuschenta cun siu emprem cudisch «Sind Mütter denn an allem schuld?».

La medema mesjamna, il suenter miezgi, envida il team dalla Biblioteca Laax ils affons da scoletta tochen la tiarza classa da far, ensemen cun *Aita Dermont*, in cudisch da maletgs. Affons che han gust da malegiar ina pagina en «Nies cudisch» dueigien vegnir cun lur mumma ni bab allas 14.30 en biblioteca.

## Scolaras e scolars exponan

Ella Casa De Mont, giudem il vitg da Laax, exponan naven dils 10 d'october entochen ils 18 da november scolaras e scolars da Laax lur maletgs. La vernissascha ha liug sonda, ils 10 d'october allas 10.00 en Casa de Mont. Tut la populaziun ei cordialmein envidada.